

東
華
續
錄

東華續錄

咸豐九十三年

臣王先謙敬編

臣陶澐宣恭校

五月甲午朔諭軍機大臣等有人奏近京直隸州縣及與豫東接壤各屬時有盜匪劫掠雖疊經參奏責緝而未經呈報者甚多恐與敗逃擒匪勾結致煩兵力請飭直隸總督責令地方文武於所屬地面各仿鄉約保甲之法變通行之訪其窩藏察其形迹懸賞購緝設法密捕並責成道府鎮協時加查考定以限期有能效者保擢無成效者參劾以清盜源等語畿輔地關緊要豈容盜匪肆行無忌恆福於失事各州縣等雖疊經參辦有案續報緝獲者甚屬寥寥可見該督徒以一參了事地方官仍屬漫不經心其未經舉發者諱飾彌縫皆所難免卽著該督嚴飭所屬文武舉辦保甲

實力稽查一經訪有匪蹤卽會督兵役密速接捕務期淨絕根株勿致養癰貽患其接壤豫東各屬尤應認真查拏以免與捻匪勾結致煩兵力儻有陽奉陰違視爲故事以及有心諱飾規避處分者恆福務卽嚴行參辦毋稍徇縱其如何責成道府鎮協時加查考予限責效以免有名無實並著斟酌妥辦具奏原片著鈔給閱看再據御史朱潮奏都城大錢日形短絀緣直隸匪徒多以私銷爲業以致民困益甚等語已諭令步軍統領衙門順天府查拏究辦仍著恆福曉諭各屬儻查有私銷匪犯卽著密速嚴拏盡法處治毋任漏網以重國法將此諭令知之○何桂清奏前赴上海商借夷兵得旨蘇垣保固尙不可借用夷兵今事已至此何事可商巧藉一避賊之地耳○甘肅肅州鎮總兵官李世忠奏謝授缺恩得旨汝自擢用以來屢挫賊鋒實堪嘉尙汝部下人數眾多並妥

爲彈壓勿致累汝聲名○袁甲三奏欽奉諭旨飭臣將苗沛霖因何與皖軍不睦密查具奏查川北道苗沛霖帶練西剿係於鳳陽未經克復之先偵知北路捻匪希圖分竄臣與該員妥爲計議俟克復鳳城後分撥勇練駐紮毫境之高家寨繞出賊巢之西設法牽制以杜竄擾豫疆並函商河南撫臣瑛棨代爲籌糧屢准瑛棨函覆籌有款項每月買糧三千石陸續運赴高家寨交收備用慶廉到任臣復加函請與勝保再爲籌畫乃接到覆函以爲非計前議頓寢不令苗練西行維時宿營攻剿閭圩沙北攻剿程圩均值喫緊隨飭苗沛霖分練協剿其協剿宿營則歸傅振邦督率協剿沙北則歸翁同書督率並以該練在皖豫之交函請勝保就近調度此苗沛霖帶練西剿係臣與各路籌商並未專令歸臣調遣之實在情形也今捻首李大澣就擒閭圩得手潘四薙髮投誠各圩

捻首均有自拔來歸之意亟宜乘此聲威勦撫互用勝保既擬馳

赴鹿邑檄調苗沛霖面授機宜正與

臣

原議相合必能妥籌兼顧

迅掃皖豫賊氛至此次苗沛霖因何與皖軍不睦

臣

實莫測其蘊

見復遵旨嚴密訪查苗沛霖曾因買鹽過卡誤疑派辦營務之道

員徐曉峯令其捐釐又翁同書在潁郡代爲籌糧萬石該員不甚

滿意或因此指爲不睦亦未可知報聞○以薛煥爲江蘇巡撫

由

政使

仍暫署兩江總督○乙未諭內閣參員訐告上司定例立案

不行其有情節較重或牽涉賊私不得不加以查辦惟審訊既屬

虛誣則挾嫌陷害之人自應從重懲治以昭平允嗣後各直省參

員訐告上司者除立案不行外其有欽派大員審訊因誣告而罪

擬徒流者均不准贖罪因有賄和而被革職者亦不准捐復以儆

官邪而懲刁健○諭軍機大臣等本日據崇實奏署四川總督曾

望顏不諳軍旅年衰偏聽聲望迥非昔比見在各股逆匪勢已窮蹙可以指日肅清乃該署督措置乖方以致人心解體蕭啟江見統楚勇到川軍務正當喫緊請飭曹澍鍾迅卽來川統籌全局剋期進剿等語蕭啟江一軍既經抵蜀自可乘此聲威殄除羣醜但該員資望較淺恐與該省統兵大員彼此不相聯絡曾望顏調度既未合宜轉多掣肘曹澍鍾前奏擬於四月下浣啟程前進著卽星馳赴蜀毋得遲延到省後仍著提調各軍掃除逆匪以靖疆圉而副委任將此由六百里諭令知之○諭翁同書奏江北應行設防並籌畫淮揚餉需一摺據稱揚郡裏下河應行設防者有三汊河沙頭萬福橋邵伯鎮四處三汊河有高阜可據沙頭有江汊可防萬福橋有寬河可恃邵伯鎮有運河可限支港重湖可憑此數處防兵不可空虛至兵勇餉需有江北地漕釐捐可用又裏下河

商賈輻輳富庶倍於往時從前雷以誠辦辦畝捐一年可得制錢三十餘萬續責成州縣辦理不設委員可無擾民之事加以裏下河各州縣商賈捐輸若增兵萬餘扼守裏下河要害經費有盈無絀等語裏下河爲江北精華糧米充裕且可爲揚郡屏蔽自宜分守要隘以防賊匪竄來商民逃散著李若珠卽行酌量情形添兵扼守毋令完善之區再爲賊擾至應徵餉需既有裏下河畝捐及商賈捐輸可資接濟著王夢齡卽於抵淮後與喬松年妥爲籌商際此經費支絀之時該署漕督等亟宜竭力圖維毋得推諉遷延務期裕軍食以利攻取翁同龢原摺著鈔給閱看將此由六百里諭知李若珠王夢齡並傳諭兩淮鹽運使喬松年知之○予安徽殉難在籍通判劉星杓等祭葬世職○丁酉諭內閣前因禮部尙書麟魁呈遞謝恩摺二分續經撤回一分當將麟魁及奏事官瑞

芳交部議處茲據吏部遵旨具奏麟魁已將奏摺呈遞復向奏事處私行撤出實屬有違定例著照部議降三級調用不准抵銷奏事官內務府員外郎瑞芳於呈遞摺件聽從撤出亦屬非是著退出奏事處卽照部議降二級畱任准其抵銷○諭軍機大臣等前據瑞昌王有齡奏蘇城被陷張玉良退回杭州業經諭令瑞昌迅督諸軍克復王有齡量爲籌濟餉需矣本日復據瑞昌王有齡奏續陳近日各路軍情並招集江南兵勇勉籌布置一摺此次蘇州失事固由於兵民互鬪潰勇附賊而江長貴一軍稽畱平望吳再升蕭翰慶等軍尙在廣德以致鞭長莫及蘇城被陷其督催不力之處不可謂非王有齡之延誤見在蘇城旣失逆餒方張蘇浙連界郡縣亦處處喫緊亟應痛加勦洗以免蔓延瑞昌見已總統江南諸軍江長貴亦已幫辦軍務所調各路援兵爲數不少計已陸

續雲集著瑞昌迅卽督帶兵勇馳往蘇省會同江長貴調派各軍
乘賊勢未定之時力圖規復毋令日久負隅並著王有齡速將江
南潰散兵勇催令張玉良等趕緊招集認真裁汰管帶前往以厚
兵力其杭城防守事宜仍著王有齡會同來存妥籌布置毋稍鬆
懈再據奏蘇州以北道路不通前摺已由上海轉遞如不能達卽
改設驛站繞道江西等語見在上海文報可通以後如有梗阻其
應否由江西繞道之處著王有齡酌量辦理將此由六百里加緊
諭令知之○諭勝保奏道員苗沛霖屢請赴穎督剿並孫葵心乞
降見已派員辦理等語並將苗沛霖及阜太士民稟函鈔錄呈覽
勝保督師皖北時苗沛霖曾歸調遣此時謂盼望該副都統前往
穎州未必非世故周旋之語該道以團練剿匪疊經保舉擢至道
員此時感激圖報無非爲朕出力勝保豈得以此市恩苗沛霖亦

豈得以此歸功勝保耶卽著勝保飭知苗沛霖以皖豫兩省勦擒雖各有統帥實則共辦一事該道員惟應聽候調度認真攻勦果能績著勞績袁甲三等豈能不以上聞不應以該副都統之到潁與否鯁鯁過慮勝保經朕簡任督辦豫省防勦原應不分畛域惟豫省團練尙未就緒自當先固豫疆徐及皖境乃屢以該道員等稟辭上煩是何居心好大喜功舍近圖遠是該副都統受病之處前在皖北督師以此挫敗尙復不知悔悟必致再蹈愆尤至孫葵心乞降狼子野心未易馴服是否出於真誠未敢深信若能殺賊自贖立功來歸再當斟酌辦理該副都統旣派知縣黃殿楨等前往招撫惟應嚴飭該員等慎之又慎不可輕率從事致貽後患將此由六百里諭令知之○諭曹澍鍾奏請飭湖南防兵就近合勦復縣賊匪並咨勞崇光派兵進攻一摺據稱廣東北江首匪陳金

鉅竄踞粵西賀縣城池並闌入富川縣境經湖南兵勇往援踏破賊壘餘匪遁回賀邑嗣因楚師撤回本省之江華縣白芒營駐守該匪復分股竄至富川縣西鄉見由粵西增募湘勇二千名派左江道蘇鳳文馳往督勦並咨勞崇光派兵進攻請飭楚省劉嶽昭一軍合力會攻以期迅速埽平等語逆匪攻陷賀縣踞爲老巢四出滋擾以致楚粵邊界連年未靖粵西兵力未厚自宜由粵東合力協勦著勞崇光迅速派兵由廣甯開建一帶前往會攻候選道員劉嶽昭所統楚軍見駐江華距賀縣不遠本日據駱秉章奏富川業經收復著該撫卽飭令劉嶽昭統帶所部兵勇馳赴粵西會同各軍進攻賀縣務期盡拔根株爲一勞永逸之計毋得稍分畛域致滋延誤將此由六百里各諭令知之○以綿森爲禮部尙書愛仁爲左都御史調基溥爲吏部右侍郎以載崇爲兵部右侍郎

由內閣
學士遷

○以滇匪竄入四川榮經縣城署總督曾望顏提督占泰

下部議處○己亥諭內閣庚長奏知縣籌募沙勇克復江陰縣城

一摺逆匪於攻陷常州後分股沿江東趨竄陷江陰縣城經常熟

縣知縣周沐潤設法籌募沙勇奮力進攻沙董嚴康保首先從鹿

苑進剿連獲勝仗徐浩統帶所部接應殺斃賊目一名殲賊七百

餘人民團同時響應奮勇追殺四面圍剿於四月十九日將江陰

縣城克復辦理尙爲得手著辭煥卽飭該縣督率民勇趁此聲勢

相機進取攻復各城毋畱餘孽○諭前因御史辭書堂及兩淮鹽

運使喬松年參奏庚長演戲宴客退守淮安各情當派文俊馳驛

前往查辦茲據該侍郎查明覆奏請旨定奪革職暫畱本任江南

河道總督庚長當清江防堵喫緊之時輒因酬神演戲已屬不知

緩急猶復觀劇終日迫聞賊警倉皇出隊迎剿失利遽行退入淮

城尤屬畏葸無能有負委任庚長著卽革任來京聽候審訊舒康等有無失守處分著王夢齡與清江失守文武各員一併迅速查明參奏○諭軍機大臣等本日據庚長奏見在江陰業經收復正可乘此聲威相機進剿計留國藩啟程赴蘇尙需時日前已諭令瑞昌迅帶兵勇馳往蘇省會同江長貴調派各軍痛加剿洗著薛煥督飭各州縣激勵民團乘勝進攻於賊勢未定之時迅圖克復蘇常以保全東南大局江陰道路疏通文報可不至梗阻並著薛煥迅速查明蘇常失陷及各屬相繼失守各城文武下落詳細情形由驛馳奏以慰廑念如上海至常熟路有阻隔卽著王夢齡飭令該縣周沐潤等督率沙勇實力堵剿以次規復各城是爲至要前據都興阿奏於四月二十六日由鄂馳往英山或先督馬隊前進尙須繞道徐宿到揚需時王夢齡見在已抵淮安著嚴飭沿江

各州縣聯絡兵勇嚴密防守以固北路藩籬清江南北沿河一帶挑壕築圩前令文俊確查實在情形辦理有無草率茲據文俊奏查驗圩工楊莊頭壩等處尙均深固足資守禦由阜河至窯灣之圩工尙未完竣著王夢齡卽飭朱善張等妥爲勸導趕緊修築以資捍衛其應如何嚴定守圩章程著王夢齡相度情形悉心籌議詳晰具奏總須兵勇民團同心守禦以期保衛地方南河因辦防堵設有抽收釐局庚長陸續添局十處撥歸淮安徐州安徽三處自四年至九年止共收釐銀二十六萬二千九百餘兩爲清江蔣壩等處各勇經費據文俊查明已經報部者尙屬相符其未經報部者有無冒銷侵蝕情弊著王夢齡徹底盤查調齊各卷冊逐款覈算詳細具奏毋任稍有捏飾以濟積弊而重防務將此由六百里各諭令知之○以署漕運總督王夢齡兼署江南河道總督○

以觀劇弛防前署漕運總督聯英等下部議處○庚子諭軍機大臣等前據李若珠奏調艇船當令傳諭吳全美將艇船二百餘號駛赴狼山福山等處李德麟師船仍畱江上梭巡以防江南竄匪並疊次諭令喬松年接濟水師餉需茲據李若珠奏上下艇師已成隔絕請派吳全美統帶艇船東下李德麟仍畱魯港先將下游布置嚴密再與楊載福李德麟聯爲一氣等語自係尙未接奉前旨著再行傳諭吳全美卽帶艇船駛赴下游聽候李若珠調遣毋許藉詞延誤長江中間見在道路不通李德麟艇師尙在魯港李若珠無從調遣楊載福前奏記名總兵陳金鼈等會同李德麟等師船將蠓磯石壘攻破是該總兵距楊載福水師較近著暫歸楊載福調遣仍飭令設法疏通江路與吳全美等聲勢聯絡總期扼截江面毋令南岸之賊乘虛北渡方爲妥善吳全美全師東下儀

徵以上是否空虛李若珠必須通盤籌畫不可顧此失彼昨據庚
長探報江陰克復此路文報已通吳全美艇船應否仍泊狼山福
山等處並著李若珠相機辦理毋稍拘泥各起艇師每月所需口
糧甚鉅江北糧臺僅撥銀數千兩斷難敷用喬松年前奏水師餉
無從出雖經戶部遵旨議撥款項交江北糧臺支發尙恐緩不濟
急李若珠曾咨令查文經趕緊接濟何以絲毫未解著喬松年傳
旨諭令查文經在上海關庫各款先行提解水師軍餉源源接濟
不得藉詞推諉致干重咎並著喬松年先行設法給發以期固結
水師卽以保全大局至江南兵勇潰散所有前欠各餉自應剷除
所集兵勇另行按月支給不得藉口補給從前欠餉致滋浮冒此
節並著喬松年傳諭查文經遵照辦理將此由六百里加緊諭知
李若珠楊載福並傳諭吳全美李德麟喬松年知之○諭前因浩

罕派來夷使遞字恐其入卡句結當諭札拉芬泰妥籌駕馭茲據裕瑞等奏稱浩罕派來額爾沁捏斯密頂等遞字仍求和好經裕瑞等將前次接獲已斃額爾沁寄回信字謀爲不軌情形與此次額爾沁閱看額爾沁頗有愧色謂係禍由自取前已寫信回浩罕將住站呼岱達舒庫爾鎖押俟新換呼岱達到來商同寫信回浩罕將前次之事說明仍然和好等語該浩罕既遣額爾沁前來善說又將呼岱達更換尙知其曲在彼似非意圖報復惟明巴什所遞字內有不肯憑信之語夷情叵測難保不暗中句結猝啟釁端已諭裕瑞等嚴密戒備深入偵探著扎拉芬泰派入詳查該大臣所奏是否實在情形詳細具奏如該浩罕回信到時仍求和好或求將呼岱達伯塔爾等罪名減輕自可俯順夷情相機妥辦以示懷柔儻該浩罕有蠢動之意亦當會商裕瑞等妥爲防範設法曉

諭毋稍疏忽將此諭令知之○諭裕瑞等奏浩罕遞字仍求和好相機辦理一招據奏浩罕派兵前往冰嶺並無其事此次派來額爾沁捏斯密頂等遞字仍求和好意尙恭順裕瑞等所擬俟新呼岱達到喀與該額爾沁寄信回浩罕之便再飭阿奇木書寫覆字一同寄去詳細開導使該夷誠信不疑如回信仍然效順或求將呼岱達伯塔爾等罪名減輕再爲相機辦理所籌尙爲妥協惟夷情叵測所言未可盡信且明巴什等所遞字內有不可憑信之語難保不暗中勾結猝啟釁端裕瑞等惟當不動聲色嚴密戒備以絕其窺伺之心並仍覓妥靠回子深入偵探不可因該額爾沁言詞恭順稍涉大意如該浩罕回信到時仍求和好自可俯順夷情妥爲辦結以示寬大懷柔之意總在該大臣等明示羈縻暗加防範毋爲該夷所乘方爲妥善將此諭令知之○辛丑許乃釗奏張

玉良以臣熟悉本省形勢屬臣先赴杭州與王有齡會商布置並
乞皖南諸軍進援蘇省以保財賦之地今蘇城已破賊必犯浙情
形又奏王有齡久官浙省洞悉地利其識見遠大才具開張實爲
濟變之才張玉良三月間克復杭城在彼相度防守亦復全局在
胸兩人會辦必能妥協臣有幫辦江南軍務之責今金陵全軍潰
退而揚州鎮江尙有兩軍水師艇船未知消息北路軍情亦形散
漫臣自應前赴揚州與李若珠會辦以防北竄無如蘇常皆陷內
河文報不通祇得乘坐海船由吳淞出海以達通州馳赴揚防臣
之職也惟是臣再襄戎幕金陵退守罪戾甚重仰蒙 天恩不卽
罷斥僅降四品京堂今又連陷四城全軍潰退尤屬罪無可追相
應請旨將臣從重治罪臣抵揚州後總當與李若珠悉心籌畫力
圖防剿以冀稍贖前愆 上諭內閣降補四品京堂許乃釗當江

南大營失利之時一籌莫展退至蘇郡又不能固守省垣見復退往揚州寶屬恒怯無能有負委任許乃釗前已撤去幫辦軍務著卽行革職畱於李若珠軍營辦理文案戴罪自效○諭軍機大臣等何桂清王有齡奏長興失守賊竄湖州杭城危急並請撫夷剿賊各摺片逆匪大股至夾浦竄陷長興蕭翰慶一軍至塘口地方遇賊接仗蕭翰慶不知下落所部奔至湖州賊卽圍撲湖城並分股繞出小路已至武康縣境距杭州僅一日之程杭城亦危急萬分江長貴一軍已抵平望因潰兵衝至遂折回湖州被圍該署提督係幫同辦軍務之員責無旁貸著激勵兵勇督同在城文武嚴密防守保衛郡城並分兵截剿武康竄匪以杜逆賊入杭之路瑞昌王有齡亦當撥派兵勇出省夾擊先清武康之匪並扼截湖州入省要路瑞昌見命總統江南各軍規復蘇城見在杭城喫緊自

當先顧杭州再圖進取毋得株守省城致成坐困張玉良一再敗退奔回杭城亦當奮勉圖功隨同保守省垣以維大局毋令再有疏失致干重咎所有見在湖州防守情形及蕭翰慶下落並著瑞昌等迅速查明具奏徐有壬照會英佛欲借夷兵防守蘇州何桂清前赴上海商辦紕繆已極江南賊勢雖張見在調集各路援兵自能力圖規復若借資夷力後患何可勝言所請應毋庸議將此由六百里加緊諭令知之○諭本日據何桂清奏自蘇州失守後賊陷長興湖郡戒嚴吳江一帶逼近賊氛情形亦甚喫重恐賊匪蔓延聯成一氣勢更不可收拾著薛煥安速布置迅圖規復蘇常毋令該匪久踞致成負隅之勢日後殲除愈難江陰克復後江路已通前據李若珠奏請將吳全美艇船二百餘號調赴福山狼山停泊與何桂清所奏賴鎮海一軍停泊福山等語果否扼要足資

策應並著薛煥與李若珠通籌酌辦水師軍餉卽飭查文經在上海關庫各款先行提撥毋誤要需廬鳳道蕭盛遠聲名平常前諭令徐有壬將該員撤任查明參奏何桂清請暫令接署臬司之處著不准行仍著薛煥查明該員實蹟據實奏參毋稍徇隱江蘇臬司另行派員署理其蘇常二府及各屬失守之文武員弁並著詳細查明具奏另片奏張國樑在丹陽禦賊官兵潰散壅塞不能前進策馬渡河水深馬沒沈溺不起據張國樑之弟張國材同都司黃長貴護送江南提督印信至上海等語著薛煥再行確切查明張國樑是否沈水抑係受傷並飭張國材迅速尋覓將實在下落情形據實具奏再降諭旨將此由六百里加緊諭令知之○以城陷脫逃及先期出城革署江蘇布政使蔡映斗署蘇州府知府吳雲元和縣知縣馮樹勳職嚴行查辦○于江蘇殉難巡撫徐有壬

祭葬世職徐有壬妻施氏等旌卹如例○壬寅諭內閣各直省軍

務未平而郡邑士民辦理團練尙能隨同官兵剿賊是團練足以

輔兵力之不逮具有明徵朕前經降旨諭令籍隸河南等省在京

官員各抒所見昨據怡親王載垣等會同周祖培等擬定河南團

練章程呈覽自應先令該省籌辦順天府府丞毛昶熙著賞加都

察院左副都御史銜作爲督辦河南團練大臣馳驛前往並著河

南鹽運使銜南汝光道鄭元善幫辦團練事宜載垣等所擬團練

章程十條卽著毛昶熙於馳抵河南後會同鄭元善按照所議條

款妥爲辦理○御史薛書堂奏臣訪聞勝保到豫謬妄不治輿情

兵勇到處傷亡軍械遺失略盡而勝保反授意帶兵各官捏飾勝

仗據爲奏報實屬有心欺罔賊騎蹂躪數十州縣勝保反在省城

飲酒狎優苗沛霖練勇勦賊來豫係袁甲三睿明河南豫備米糧

三萬石爲該練接濟之用乃勝保忌其有功藉口調用寨民將此項米糧全行截畱致該練枵腹向太和阜陽兩縣勒率口糧鄉民驚逃幾生大變勝保向來尙稱勇敢近因屢次敗挫銳氣全銷賊擾內地並未出省迎剿賊將出境始行進駐歸德復行飾報勝仗保舉多員恐剿賊萬難有功 上諭副都統勝保經朕特簡督辦河南剿匪事宜乃本年春間皖匪擾及豫境勝保未能出省認真堵剿任令匪蹤深入近省各屬多被蹂躪迨至捻眾回巢始赴歸陳防堵以致物議沸騰實屬畏葸無能有負委任勝保著卽來京以三品京堂候補其統帶兵勇並河南防堵事宜卽著慶廉督辦仍著副都統關保幫同辦理○諭軍機大臣等前因蘇常失守屢次諭令曾國藩帶兵迅速馳赴兩江總督署任並令兼程繞道由浙赴蘇會同瑞昌調度各軍迅圖攻克本日有人奏安慶一城經

曾國藩水陸布置聯營圍困賊已援絕勢窮剋日可復如舉建瓴之師直擣金陵急攻東壩踞蘇之賊必回顧巢穴卽以援蘇之兵乘勢夾攻則蘇州可復常州可圖較之由長江取道赴蘇似爲便捷各等語蘇常爲東南財賦之區且係數省咽喉自應以急籌攻復爲上策見在賊勢已直趨杭湖勢將糜爛兩省尤爲刻不可緩曾國藩接奉前旨擬由何路行走尙未據該署督奏到如果安慶一城指日可復該署督正不妨先克安慶沿江而下乘金陵賊眾空虛之時直擣巢穴一面調派援兵併力夾攻蘇州使賊首尾不能相顧似較便捷曾國藩旣膺重任責無旁貸其安慶是否可以卽復金陵是否可進攻不至牽掣兵力久頓堅城抑或設法先解蘇常之厄均著酌量緩急妥籌辦理原摺著鈔給閱看將此由六百里加緊諭令知之○命戶部右侍郎劉岷往奉天巡查海口曾

同盛京戶部侍郎倭仁妥議稅課章程○甲辰諭內閣曾望顏奏
官軍會擊滇匪勦撫兼施川滇邊界肅清一摺滇匪李短搭搭竄
入川境後夥黨盤踞滇邊一帶遙爲聲援意圖會合經川省官軍
隨時擊退勦撫兼施匪首馬源盛等先後乞降隨同參將祥符等
越境進勦擒斬多名先將柿子壩等處賊巢掃蕩適雲南官兵由
大關會勦分途接捕復將李逆之弟李小花么匪首羅四板枷等
次第誅滅其敗竄各匪悉被滇省兵團殲斃川滇兩省邊界地方
一律肅清勦辦尙爲得手所有在事出力員弁紳民准其擇尤保
奏候朕施恩○曾國藩奏自古平江南之賊必據上游之勢建瓴
而下乃能成功自金陵被陷向榮和春等皆督軍由東面進攻原
欲屏蔽蘇浙因時制宜而屢進屢挫迄不能克金陵而轉失蘇常
非兵力之尙單實形勢之未得也今東南決裂賊焰益張欲復蘇

常南軍須從浙江而入北岸先克安慶和州南岸先克池州蕪湖庶得以上制下之勢臣所部萬餘人已進薄安慶城下深溝固壘空濬長濠若一撤動則多隆阿攻桐城之軍亦須撤回卽英山霍山防兵均須撤退各路皆退則軍氣餒而賊氣盛不但鄂軍難以自保卽北路袁甲三翁同書各軍亦覺孤立無援是安慶一軍目前關係淮南之全局將來卽爲克復金陵之張本此臣反復籌思安慶城圍不可遽撤之實情也臣奉恩命權制兩江必須帶兵過江駐紮南岸以固省會之人心而壯徽軍之聲援見定於十日內撥營渡江駐紮徽州池州兩府境內擬於江之南岸分兵三路一由池州進規蕪湖一由祁門至旌太進圖溧陽第三路分防廣信玉山以至衢州與張玉良王有齡就近聯絡各軍一面遣員回湘添募勁勇約須七月方能到齊八月方能進剿此臣移師皖南擬

募新勇分路進剿之情形也從前金陵大營以蘇常爲根本餉糈軍械源源取給故能支柱數年臣今自皖南進兵應以江西爲根本昨據安慶營中盤獲逆首陳玉城自金陵發來偽文內稱見派賊目楊輔青李侍賢李秀城等直取蘇常再攻徽浙以竄江西又擬派賊目吳如哮張落刊由定遠壽潁六霍以竄湖北兩路大舉等語蘇常已失則該逆所稱各狡計均屬意中之事急須先事豫防湖北各軍有官文胡林翼調度量可無虞江西兵力單弱實不足以禦百倍之賊必須湘南勁旅越境協防湖南撫臣駱秉章素顧大局爲聖主所深知賊若窺伺江西所有兵勇餉械當借資湖南臣等往返咨商竭五六兩月之力辦江楚三省之防仰仗皇上威福能待兵勇漸齊布置漸定然後賊至與之力戰所以保固江西兩湖者在此所以規復安徽三吳者亦卽在此目今賊勢

方熾人心大震但求立腳之堅定無令逆氛之增長此臣聞賊計大舉上犯擬先防而後剿之情形也臣才識短絀夙乏遠略姑就近處籌畫略陳梗概其松江等屬是否尙存蘇省文武殉難若干暨淮揚定遠如何設法保全應俟查明熟籌陸續陳奏胡林翼奏臣聞戡亂必在仁賢理財必先政事古今無不平之賊而在先求平賊之人非常之才不可以拘牽資格修飾邊幅爲用也臣查前任江西廣饒九南道沈葆楨識略冠時才堪濟變其在廣信府任時賊眾數萬颯忽烏集軍民震駭巷無居人沈葆楨登陴設守效死不去遂以集援兵而完境土咸豐九年乞假歸養至今廣信士民望如慈父母臣雖未與識面官聲所播知爲奇才又浙江候補道李元度血誠果毅志節清嚴在江西勸捐練勇轉戰建昌廣信二府保守貴溪弋陽玉山廣豐四縣江西浙江軍民至今稱之以

上二員如蒙恩畀以封疆藩臬之任責令籌兵籌餉必有守正不阿之節應變無窮之略又湖南在籍四品卿銜兵部郎中左宗棠精熟方輿曉暢兵略在湖南贊助軍事遂以克復江西貴州廣西各府州縣之地名滿天下謗亦隨之其剛直激烈誠不免汲黯太慙之譏要其籌兵籌餉專精殫思心固無他又湖南候選知縣劉蓉曾同羅澤南李續賓等帶勇立功學有本源志期遠大膽識恩威能結士心而寄軍政惟至今高臥故山不肯輕試以上二員應請 聖明酌量器使並請旨飭下湖南撫 臣令其速在湖南募勇各六千人馳赴江西浙江皖南一帶必能補救時艱 臣又訪聞告病編修劉熙載貞介絕俗學冠時人見任順天府府丞毛昶熙品節謹飭畱心吏治降補御史辭鳴皋德望清峻操守第一可否特恩簡用伏乞 聖裁又聞降調御史尹耕雲胸有權略戶部郎

中楊寶臣堅忍耐苦吏部主事梅啟照任勞任怨刑部主事范泰
亨才識過人河南知縣田玉梅膽略任戰以上八員臣均未識面
亦無文字往來訪聞既確據實附陳以備聖主採擇至覓在湖
北藩司嚴樹森綜理精密才勝吏事湖北安襄鄖荊道毛鴻賓好
善嫉惡秉心公正總辦湖北營務兼管糧臺之戶部員外郎閻敬
銘綜覈名實居心正大總理營務湖北候補道邢高魁樸誠質直
遇事求實見當籌兵籌餉急切需才臣舉其姓名而不遽求恩澤
其應如何破格錄用因材器使之處均出自聖裁又奏查曹澍
鍾本不知兵在廣西時一無展布屢陳川省軍情自謂官民信服
不過欲脫離殘破之廣西而莅完善之川省曹澍鍾與臣均是丁
憂人員負罪從戎尙恐難安希幸升擢心尤可鄙况其夸詐巧猾
眾皆知之川中關繫全局臣何忍瞻徇不言昨聞成都將軍東純

行抵鄂省可否飭催該將軍兼程前往接辦軍務並求 天恩收
回曹澍鍾督辦軍務成命或於川省有裨如一時乏人調張亮基
劉長佑協勦均尙有益否則東南旣經決裂西南復倚任非人天
下事何堪再誤 臣忝膺疆寄自愧不能稱職曷敢作越俎之謀無
如時局日艱生民塗炭不得已披瀝垂涕而密陳之伏懇 皇上
慎簡督撫將帥必深察其心術才力聲望之實際而不輕爲嘗試
保全大局天下事庶尙可爲 上諭軍機大臣等前因江南逆燄
鴟張蘇常失守特命曾國藩署理兩江總督並疊次諭令統帶各
軍兼程前進本日據曾國藩奏統籌全局並辦理大概情形又據
胡林翼奏敬舉賢才力圖補救並瀝陳四川軍情各摺片曾國藩
見在進兵安慶已薄城下驟難撤動而蘇常一帶望援孔亟亦須
帶兵過江先固人心所稱平江南之賊必據上游之勢見已駐紮

徽池境內分兵三路一由池州進規蕪湖一由祁門至旌太進圖
溧陽一分防廣信玉山以至衢州並聞賊欲分竄江西湖北須俟
湖南協防江西兵勇布置妥協約須八月方能進剿各情通籌全
局甚合機宜卽著照所擬辦理至四川軍務關係緊要本日據胡
林翼陳奏各情業經降旨令東純兼程前往署理四川總督並令
暫時接辦軍務曹澍鍾已令回籍終制矣該撫所保之左宗棠一
員前已有旨賞給四品京堂令其襄辦曾國藩軍務若令督辦川
省軍務能否獨當一面於大局有無裨益卽著妥速籌商如可勝
任卽一面令該員迅赴川省一面奏聞再降諭旨其沈葆楨一員
已諭慶端等飭令前赴江西俟李元度募勇到時卽可駐防一處
劉蓉一員並諭知駱秉章飭令募勇六千前赴江浙皖南等省張
運蘭一軍已令迅速前往該員等到後卽著曾國藩胡林翼分別

差委調遣再本日據曾望顏奏蕭啟江在四川省城病故其所部全軍請迅由楚省揀選得力大員兼程來川以資統帶卽著官文等於湖南湖北兩省中揀派得力大員迅速馳往四川接續管帶以資攻勦將此由六百里加緊名諭令知之○曾國藩奏告病廣饒九南道沈葆楨前在署廣信府任內堅守郡城保全東路嗣蒙簡任監司仍畱辦理防務籌兵籌餉吏畏民懷前年春石逆自撫建傾巢竄浙卒不敢直犯郡城其後李元度守廣豐玉山均因該道接濟得全其去廣信也士民遮道攀援來臣處遞呈請畱者凡十數次該道以二親年老力請告歸見當時勢艱難聞該道雙親尙健合無仰懇 天恩飭下福建撫臣傳諭該道迅由本籍馳赴江西於大局必有裨益至該道器識才略實堪大用臣目中罕見其匹 上諭本日曾國藩奏請起用告病回籍道員以資熟手一

摺著慶端等卽飭沈葆楨迅速馳赴江西聽候曾國藩等差遣委用毋稍遲延將此由六百里諭令知之○諭曾國藩奏軍營調遣乏員請飭催張運蘭迅速帶兵助剿等語前因曾國藩請調道員張運蘭一軍業已諭知駱秉章令該員統帶所部迅赴湖北軍營隨同剿賊茲據奏稱見擬渡江由徽池等處分路進剿兵力尙單將領亦乏獨當一面之才恐不足以資剿辦著駱秉章卽飭張運蘭剋日起程由湖南取道江西至饒州一帶聽候曾國藩調遣毋得遲延紆折致誤事機本日又據胡林翼奏請飭候選知縣劉蓉由湖南募勇六千名馳赴江浙皖南援剿並著該撫飭令該員安速遵辦將此由六百里諭令知之○署廣西巡撫曹澍鍾奏審明守禦不力之已革象州知州盧承勳並無逃避情事請免治罪得旨盧承勳身任地方於賊匪撲城時藉名赴金雞塘迎敵復捏報

受傷迫賊匪退後尙欲倖免失城之罪殊屬可惡著卽發往新疆效力贖罪又奏遵查前任按察使黃鍾音殉難情節批念念不忘家事實不足徵其見危授命黃鍾音著仍遵前旨勿庸給予卹典

○曾國藩奏

臣

蒙恩簡署江督目下蘇常新失徧地賊氛應以兩

湖爲籌兵之源江西爲籌餉之源

臣

自咸豐三年至今均係自設

糧臺自辦報銷以本無地方之責也今擬札委江西藩司接辦糧

臺仍添委道府數員幫同辦理其自咸豐三年至十年五月由

臣

分作三案造冊報銷接總督印務以後卽由江西藩司衙門報銷

以專責成至江西歲入之款除錢漕外專恃牙稅釐金

臣

見咨商

撫臣毓科仿照湖南章程牙釐另設一局遴委道府大員專管不

作藩司收款復仿照湖北章程督

臣

撫

臣

分辦

牙釐

錢漕

仍互

相

通

融

互

相

稽

考

此後

江西

通省

錢漕

應歸

撫

臣

經收

以發

本省

綠

東華續錄

咸豐九十三

十六

營及各防兵勇之餉通省身釐歸臣設局經收以發出境征兵之餉似此眉目分明庶官吏各有職守銀錢出入滴滴歸源杜絕影射浮冒諸弊得旨戶部速議具奏○命前任廣東按察使齡椿往天津軍營差遣委用○命曹澍鍾回籍終制以東純兼署四川總督辦理剿匪事宜署成都將軍○贈故記名按察使蕭啟江巡撫銜予祭葬卹廕○乙巳袁甲三奏定遠剿賊獲勝並李世忠擊賊情形得旨李世忠約軍尙嚴然人數太眾當查其部眾以免勾結○丙午諭軍機大臣等前因糧臺移設望亭當諭張玉良等仍派查文經督辦茲據何桂清奏江北喫緊已飭查文經與記名總兵曾秉忠先帶師船往高寶邵伯湖一帶會商防剿查文經係專辦江南糧臺之員陳欠新餉豈能歸於無著非何桂清心已昏憤卽係該員自爲脫身之計著辭煥迅速追回飭令清理江南糧臺事務本

日又據魁玉奏江北餉源告竭水師艇船餉無所出情形萬分危急所派輪船赴上海請餉轉運諸多不便等語此項水師餉需前經諭令喬松年傳旨令查文經寬爲籌備並著薛煥派委妥員帶赴江北糧臺暫行支放水師餉需毋許遲誤至張國樑殉難情形及蘇常文武下落屢經降旨令查明馳奏至今未據奏報著薛煥迅卽查明覆奏前已有旨令薛煥拏問何桂清諒已接奉著趕緊起解勿稍耽延再何桂清奏據吳煦訪獲奸細姜少汀據供賊陷蘇城金陵潰散兵勇投賊者數萬人內有大營領兵官李文炳及不知姓名戴紅頂者二人均已降賊等語大營潰退兵勇降賊至數萬人已堪髮指而領兵官李文炳及一二品官員亦相率從賊想蘇常失陷其查無下落投降逆匪者不知凡幾並著薛煥詳細查明據實具奏將此由六百里加緊諭令知之○諭前因李若珠

奏將吳全美艇船二百餘號調赴福山狼山停泊當令傳諭吳全美卽帶艇船駛赴下游聽候李若珠調遣旋據何桂清奏派賴鎮海一軍停泊福山復諭辭煥與李若珠通籌酌辦茲據魁玉奏鎮城孤懸南岸若無重兵屯紮瓜州金山以爲聯絡則孤立無援見在京口師船僅十餘隻不敷調撥請飭江北迅撥艇船駛赴瓜鎮停泊等語賊匪攻撲鎮江疊經兵勇會同艇師擊退是舟師之有裨於南北兩岸非淺所有吳全美艇船能否分撥瓜鎮金山一帶停泊以爲犄角之勢著李若珠酌量情形相機辦理何桂清奏記名總兵曾秉忠所帶長龍船前於克復九洲洲及長興縣城暨湖州解圍殺賊甚多又見在防守鎮江之總兵馮子材陳國泰副將向奎等節次擊賊厥功甚偉所有出力之員弁兵勇著查明咨報曾國藩保奏又常熟縣知縣周沐潤會同紳士龐鍾璐等雇募沙

勇克復江陰縣城業經降旨將周沐潤及團首黃元昌等優加獎
勵其沙勇出力人員著一併查明咨報曾國藩擇尤請獎候朕施
恩江北水師糧餉不繼本日已諭知薛煥派委妥員攜帶兵餉赴
江北糧臺暫行支放水師軍餉該委員未到之先仍著喬松年先
行設法接濟毋得諉卸致誤事機將此由六百里加緊諭知李若
珠並傳諭喬松年知之○諭前據王有齡奏長興失守賊竄湖州
杭城危急當諭令瑞昌先顧杭州再圖進取本日據何桂清奏吳
江崑山失守浙省自二十四日以後文報不通情形甚爲可慮並
據拏獲奸細供稱嘉興失守數日未據瑞昌王有齡奏報朕心實
深懸繫著瑞昌等卽查明嘉興失守是否確實及近日軍情如何
布置迅速具奏江長貴已抵平望因潰兵衝至遂折回湖州據奸
細供稱係打仗失利亦與王有齡所奏不符並著據實具奏杭州

嘉湖見在萬分喫緊該將軍等務當督飭兵勇迅速堵剿並激勵各屬城鄉團練合力殺賊毋令蔓延將此由六百里加緊諭令知之○玉明奏金州地方先後聚集洋船六十餘隻在和尙島青泥窪大孤山等處停泊時復登岸拆毀民房紮蓋帳房演放槍礮搶掠牲畜顯有窺伺滋擾情形臣因金州城池緊要將前次挑備省城等處官兵調派記名副都統協領奇凌阿統帶馳赴金州並前調熊岳官兵均歸該協領統帶奏入諭令與副都統希拉布會同旗民地方官斟酌緩急妥爲布置○丁未諭軍機大臣等據喬松年奏淮海兩屬推廣抽釐可否改交署漕運總督察看辦理等語前據喬松年奏請於淮海兩屬擇地設局推廣抽釐經戶部議交兩江總督察看辦理見在曾國藩尙未到任所有該運司請於淮海兩屬推廣抽釐之處有無滯礙著王夢齡按照部議就近察看

情形斟酌妥議辦理以免稽延另片奏鎮筭營兵目張士瑚又名張四鬚又名張治國向糧臺索餉逞兇恣鬧請飭密拏等語鎮筭鎮兵前已調赴江南自南岸失事後該營兵逃潰無蹤並聞此軍全爲賊匪裹去該兵目安居江北尙敢公然索餉前文煜管理糧臺時因該兵目奸狠無賴包攬盤剝把持挾制種種不法奏請查拏正法和春未能認真查辦奏懇寬免乃張士瑚怙惡不悛膽敢索餉肆擾藐玩已極當辦理軍務喫緊之時難保不聚眾要挾滋生事端並據喬松年奏報該兵目黨與頗多恐李若珠不能鈐制致釀大患著王夢齡密派妥員不動聲色前往設法查拏訊明後卽行正法以肅軍令而杜後患將此由六百里諭令知之○予廣東陣亡遊擊黃鴻鴻等祭葬世職○己酉諭軍機大臣等前經諭令喬松年傳旨令查文經於上海關庫先提撥水師軍餉解赴江

北糧臺暫由喬松年支給嗣後據魁玉奏江北餉絀當諭薛煥飭令查文經寬爲籌辦派員帶赴江北糧臺暫行支放水師餉需矣茲據巴棟阿奏鎮江水陸嚴防力遏北竄請飭薛煥籌撥餉需等語見在蘇常失陷鎮江爲南北咽喉愈形喫重自應扼要嚴防以杜賊匪北竄所有水陸兵勇應支餉需據該副都統派撥艇船繞赴上海僅領五萬兩見當防剿喫緊之際各營待餉孔殷著薛煥設法籌款並籌辦兵米迅速遴委妥員帶赴江北糧臺或於泰州城內分設糧臺專放鎮防水陸各營軍餉及大江水師餉糈以便就近支領毋稍延誤並據巴棟阿奏上海內河道路尙未疏通須以火輪船運餉入江較艇船爲靈便此項輪船旣據稱曾經協同艇師攻剿得力著薛煥卽飭吳煦將前在鎮防之商捐輪船二隻調赴鎮江聽巴棟阿調遣以資防剿兼備轉運軍餉本日據張芾

奏湖州解圍長興亦已收復浙省文報見在是否已通如探有詳細情形著迅速具奏將此由六百里加緊諭令知之○諭本日據李若珠奏鎮城一軍與各起艇師口糧無著請歸喬松年一手經理復據巴棟阿奏鎮江水陸兵勇乏餉已久請飭江南糧臺籌款撥解各等語鎮江艇師餉需前諭薛煥籌備派委委員帶赴江北糧臺暫行支放本日復諭薛煥迅速籌撥諒該撫已經籌備不日可由委員帶到矣其仙女廟招集之二千餘人應歸江北糧臺支給著喬松年迅籌支發毋使飢潰薛成良一軍八千餘人既經遣散回籍新募之勇未必得力著毋庸募補本日都興阿奏已抵英山湖北餉絀難期接濟將來該將軍馳抵江北即將裁勇所餘口糧接濟都興阿一軍鎮江在事文武官弁兵勇奮勇擊賊力解城圍深堪嘉尚前已有旨令李若珠查明咨報曾國藩保奏惟該署

督到任需時保奏太遲恐不足鼓勵軍心著巴棟阿查明尤爲出力各員奏請獎勵候朕施恩將此由六百里加緊各諭令知之○予廣東陣亡殉難吏目尹紹伊等浙江陣亡道員蕭翰慶等湖北殉難從九品帥遠星安徽陣亡遊擊榮勝等祭葬世職○庚戌諭內閣戶部奏遵議曾國藩請設立糧臺釐局一摺署兩江總督曾國藩見在督兵進剿所有該署督糧臺卽著札令江西布政使總辦再派道府數員幫同辦理由江西報銷並准其將江西錢漕仿照湖北章程歸巡撫經收以充本省兵餉其通省身稅釐金亦准其照湖南章程另設一局由該署督自行經收以充征兵餉需仍應彼此互相通融稽考毋令稍滋流弊至該署督前次帶兵所設行營糧臺尙未報銷著卽分案造報免致轉轄江西身稅釐金自設局以來收支數目亦未報部著曾國藩會同江西巡撫將前收

款項先行截清數目造報以清款目而免牽混○諭前諭河南等省辦理團練並令順天府府丞毛昶熙回籍督辦因念山東地屬海疆毗連畿輔陝西與川豫接壤地方均屬緊要自應一律辦理所有應辦事宜卽著籍隸山東陝西在京大小官員各就地方情形直抒所見該兩省官紳中有名望素著練達事務者並著各舉所知候旨派往該官紳等必知其體時艱助兵濟餉不但爲國家保守疆域亦可自衛桑梓朕實有厚望焉○諭軍機大臣等本日據喬松年奏滙陳江南招勇之弊並請豫調近省營兵備剿一摺所稱蘇州等城失守皆由賊匪豫先薙髮前來充勇因而將兵勇勾結官不及知臨時卽紛紛投賊恐新派統兵大臣到後復須募勇則久漬之勇又將重出應募賊匪故智得以復萌擬請停止招勇卽調派護軍營暨北五省之綠營令其馳赴江南北交新授統

兵大臣布置所籌均係思患豫防不爲無見見在江南北兵額不敷急須增補京營及北五省兵丁驟難調撥著曾國藩瑞昌巴棟阿李若珠薛煥王有齡等通籌辦理如該營餘丁多已補盡即將所出兵缺行文該省督撫在本籍補挑精壯起送到營其路途資斧官爲籌給不准以彼省之人充此省之兵以重營制而資得力至招募勇丁本多流弊如曾國藩等所帶之勇俱係土著始能所向有功若以烏合之眾漫無紀律無事則虛糜糧餉有事則臨陣潰逃殊爲可恨見在江南潰勇多已投賊著薛煥卽飭糧臺查明開除不准冒領賞卹及資遣回籍等項銀兩其見存之勇如係無業遊民打仗不能得力者卽著嚴行裁汰如查有投賊之勇薙髮再出應募者著卽行正法以肅軍律將此由六百里各諭令知之○諭本日據喬松年奏江南大營募勇多係無籍游民平時不守

紀律臨陣輒行潰散甚或紛紛投賊流弊不可勝言已諭令江蘇
浙江各督撫並帶兵各員分別裁遣矣向來楚省鄉勇多係土著
良民勦匪頗稱得力昨據都興阿奏馳抵英山調撥馬隊並會商
胡林翼調取余際昌勇丁三千餘名此項勇丁或能如數調到或
由楚另行添募著都興阿妥爲擇選務須土著有籍者方可令其
入伍斷不可以無業游民濫行充數致貽無窮之患該將軍請飭
袁甲三豫籌餉項接濟楚軍一節昨據喬松年奏辭成良一軍八
千餘人由九洑洲潰退江北已由該運使散遣回籍當已諭令將
此項裁勇口糧畱爲都興阿所帶楚勇餉需接濟矣該將軍務當
就見在調到馬步兵勇由楚省先爲籌備餉需迅速前赴江北以
圖攻取勿誤事機將此由六百里諭令知之○命署漕運總督王
夢齡督同兩淮鹽運使喬松年辦理江北糧臺○辛亥諭軍機大

臣等據瑞昌王有齡奏備陳蘇常等處失守情形見在收集潰軍急圖進剿並調兵專防杭州省城以待援師各摺片張玉良自常州至無錫蘇州節節敗退前經降旨將其革職畱任以示懲儆因該提督未知命其總統諸軍情尙可原所請治罪之處著加恩寬免張玉良前援救浙江頗爲神速此時旣知愧奮著卽親督大隊由嘉興平望進攻蘇州迅圖克復以贖前愆江長貴因傷退回瑞昌等應添官軍協同張玉良赴蘇進規蘇郡卽以自固嘉湖藩籬如所調彭斯舉吳再升饒廷選各軍均可酌派赴蘇不可株守杭城致蹈從前覆轍至杭城情形見在喫緊張玉良旣督隊先行瑞昌起程不妨稍緩江西福建赴援各兵勇計日亦當到杭著瑞昌王有齡分撥出省以勦爲防是爲至要所請撥餉已交戶部速議惟蘇常失陷上海關稅必然寥落恐軍餉一時難繼王有齡旣將

江蘇寄存銀三十萬兩全行用罄自應兼顧蘇餉毋得稍分畛域
自取唇亡齒寒之禍將此由六百里加緊諭令知之○諭本日據
文煜奏幅匪洪佃一由江南邳州竄入東省嶧縣糾合土匪屯聚
洪山一帶蘭山費縣兵勇及青州撥往馬隊先後進剿失利見將
撥赴海口防夷之挑備官兵二千名內截畱一千名改撥剿捻等
語又據德楞額等奏洪佃一股匪已由該副都統等督帶馬步各
隊在蘭山費縣境內接捕疊次擊斬七百數十名匪徒四散見飭
江南山東地方官督帶鄉團合力兜剿等語著德楞額等乘勝分
投剿殺務將此股兇匪殲除淨盡毋令蔓延此時幅匪如已追剿
出境文煜所撥兵一千名卽可調回仍防海口將此由五百里各
諭令知之○浙江巡撫王有齡奏幫辦軍務江南提督張國樑陣
亡請卹得旨仍應訪查實在下落如尙未亡或遇救得生猶堪備

干城之選又奏辦理防勦請將丁憂總兵官劉季三畱營調遣允之○以浙江湖州解圍並克復淳安縣城賞在籍知府趙景賢花翎巴圖魯名號餘升敘有差○予浙江殉難在籍兵部侍郎戴熙尙書銜祭葬世職建祠諡文節道員俞焜等祭葬世職○壬子恩錫緣事降調以毛鴻賓爲安徽按察使由湖北安襄鄖荆道遷○調察哈爾馬二千匹解京候撥○調直隸北路精兵四千名赴青縣候撥○鴻臚寺卿曹毓瑛奏江南大營決裂由於分兵援浙而浙省所以被陷則以徽甯等防任賊長驅而張芾周天受不爲之堵禦也徽甯爲江浙門戶竭浙江全省之力數年供應一旦賊至如入無人之境臣知皇上洞鑒張芾周天受之貽誤而一時未遽罷斥者特以該處離金陵較遠不得不暫畱統帶見在曾國藩將抵徽州徽甯爲兩江所兼轄曾國藩所帶之兵僅有萬名而該處除分撥

援浙外尙有三萬餘名主客之勢輕重不侔於行軍殊多窒礙可
否將徽甯軍營兵勇統歸曾國藩節制並飭查明虛冒裁汰老弱
以清宿弊曾國藩得此重兵即可簡其精銳進剿蘇常不至俟新
募之勇曠日持久而後成功於東南大局不無裨益奏入畱中○
甲寅諭內閣前諭山東等省在京大小官員各就地方情形仿照
河南辦理團練章程直抒所見並令各舉所知候旨派往茲據大
學士賈楨等酌擬辦理章程八條呈覽均屬可行自應一律籌辦
著派前任戶部右侍郎杜翻作爲督辦山東團練大臣馳驛前往
並著山東登萊青道貢璜登州府知府暫畱濟甯州知州盧朝安
幫辦團練事宜卽按照所議條款並參酌河南章程體察情形妥
爲辦理○諭軍機大臣等前據李若珠奏辭成良一軍八千餘人
因欠發口糧遣散回籍茲據喬松年奏辭成良見在全隊逗畱邵

伯湖中其心叵測本日復據王夢齡奏辭成良因與糧臺細故帶領所部及眷屬貲財竟赴高郵聲稱欲赴袁甲三營又稱往依李世忠各等語辭成良獻地歸誠業加賞賚何至因偶欠口糧遽萌異志復統全隊泊於高郵湖中四出窺伺若如王夢齡所奏因糧臺細故卽帶領所部並糾合潰勇直赴高郵是其帶隊而行出於負氣並非心存反覆足見辦理糧臺各員調處失宜致令激而他去所有實在情形及因何與該員不合之處著喬松年查明回奏至辭成良糾眾北行經詹啟綸勸回不允竟將副將王萬清拘留船中心多叵測不可不防惟江南大營潰散勢成糜爛江北亦時防竄突且捻匪肆擾在在堪虞更不可操之過蹙致激而爲匪另起一股又屬滋蔓難圖著密爲偵探如果往投袁甲三營或往李世忠營卽飛咨袁甲三妥爲撫綏以消反側之心儻查有滋事實

迹著李若珠等密爲設法卽照抗違軍令之案殲其渠魁餘眾分別解散若如該運司所奏李若珠分調水陸大隊尾追其後不獨使其生疑且以有用之兵被其牽掣總非善策該署督等惟當妥籌辦法毋致撫馭失宜又肇釁端是爲至要將此由六百里諭知王夢齡李若珠並傳諭喬松年知之○以朱鳳標爲左副都御史

由通政使遷

○以瑛榮爲陝西布政使吳春煥爲陝西按察使

由潼商道遷

○乙卯諭內閣前諭河南山東等省辦理團練並已令順天府府丞毛昶熙前任戶部侍郎杜翻等同籍督辦因念順天直隸爲畿輔重地尤屬緊要自應一律辦理所有應辦事宜卽著籍隸順天直隸在京大小官員就地方情形各抒所見該省官紳中有名望素著練達事務者並著各舉所知候旨派往該官紳等必知其體時艱盡心籌辦用副朕綏靖畿疆之至意○諭軍機大臣等前有

旨令安徽等省舉行團練已令在京官員各舉所知皖省被兵數年郡邑淪陷卽偶爾攻克一二州縣賊至復失終未能一律肅清其團練殺賊隨同官兵出力者所在多有惟未能全行舉辦以致人心不固平日漫無準備聞警相率潛逃地方官虛報募勇實招致無業游民充數藉以侵蝕口糧賊匪一至民無鬪心勇亦潰散遂致棄城不守糜餉勞師伊于胡底朕思該省雖大半糜爛若就完善之處先爲辦理多一良民卽可少一賊匪未必非釜底抽薪之計並令紳士督辦使互相聯絡眾志成城且可免百姓無所依從及藉端滋事之弊如能辦理得力卽可化莠爲良悉臻平靖見在鳳陽懷遠全椒等處次第收復各處賊圩亦多攻克正宜實力舉行以輔兵力之不足著袁甲三翁同書查明未被賊陷及業已收復各府州縣已辦者幾處未辦者幾處如何辦理始能有利無

害會同妥商詳細具奏皖省紳士如苗沛霖徐立壯等隨營助剿固能懋著戰功卽保衛鄉閭如桐城紳士疏長庚等亦能帶練得力屢卻賊匪可見認真舉行具有成效該大臣等諒必悉心籌畫不至空言搪塞也將此由六百里諭令知之○丙辰諭軍機大臣等前據裕瑞等奏浩罕遞字仍求和好當諭暗加防範以杜釁端茲據裕瑞等奏浩罕額爾沁遞字情詞恭順並稱已由住站安集延人眾出具聯名結數前次額爾沁之非與此次額爾沁信函專人送回浩罕仍求和好等語該夷等旣稱其曲在彼立意求和倍常遜順或可不至再啟釁端惟詳閱浩罕明巴什所遞怕爾希字不但於額爾沁之不法大有疑詞卽將該額爾沁毆斃亦大以爲非是種種不平尙未釋然於心須俟此次額爾沁信函到時看其是否誠信無疑方可無慮更恐該夷僞爲恭順以懈人心乘我不

備暗圖報復夷情叵測不可不防裕瑞等仍當恪遵前旨明示羈縻暗爲戒備並深入偵探以絕其窺伺之心不可因其言詞恭順遂涉大意裕瑞著暫緩來京俟夷務辦結各卡安靜再奏明請旨將此諭令知之○諭前因王夢齡奏辭成良因與糧臺細故帶領所部竟赴高郵當諭令喬松年將實在情形查明回奏茲據李若珠奏辭成良恃眾索餉擅劫副將見調官軍四面合圍等語辭成良糾眾北行逗畱邵伯經糧臺解到餉銀輒欲盡索從前積欠之餉副將王萬清當向開導竟拘畱船中揚帆遁去所過露筋一帶頗爲滋擾辭成良索餉劫官任意妄爲自應大加懲辦惟見當賊勢猖狂之際若操之過蹙必致激生事端並恐以後賊匪藉口將來未必肯再作投誠之計其已經自拔來歸者亦恐心存疑慮反側不安於辦理招撫解散脅從之法未免窒礙况辭成良旣授職

官卽查明有滋事實迹亦應照軍法治以應得之罪其部下勇丁宜將首先滋擾之人嚴加懲辦餘眾分別解散方爲妥善著李若珠趁此圍攻得手之時飭令該勇丁等將薛成良並首先滋事之人一併交出訊明後定擬具奏請旨儻有意致死滅口惟李若珠是問其餘善爲安撫分別遣畱勿得激成事變以弭釁端將此由六百里諭令知之○薛煥奏探聞洋船北駛及額爾金已抵吳淞口並克復嘉定等各情形王明文煜奏佛人由煙臺駛入劉公島將口內商船全行拉去並在乎暢河口一帶外洋拉去船隻英酋額爾金已抵吳淞口佛酋葛羅當亦隨後可到奏入命薛煥等開導洋商竭力妥辦○以畏葸無能革浙江提督鄭魁士職○丁巳諭內閣載垣等奏訊明宇商濫支經費情形請旨辦理一摺前經戶部奏五字官號案內奏銷先未立案該司員等任意濫支請訊

明歸案著追茲據載垣等奏訊據已革戶部郎中王正誼供稱字商迭次將墊賠各款呈請回堂覈銷經該堂官等飭令嚴行覈減嗣經該革員等議定減去六成准銷四成時因各項頭緒紛繁堂諭嚴催趕辦奏銷未及辦稿至奏銷後始行補辦存彙又據已革戶部員外郎台斐音等供認畫彙時曾經見過此項覈減清單委因回堂催辦奏銷未及趕辦存彙奏後始行補辦並無情弊各等語此案字號月支經費曾經奏明定數何得再行加增即使食用不敷亦應奏明請旨辦理該司員等率行混入奏銷案內彙總開銷事前又不明立彙案以致漫無查考所供因催辦奏銷未及趕辦存彙是否實有其事並因何准令濫支之處著辦理字號奏銷及標畫存彙之戶部各堂官據實明白回奏另片奏革商顧青田虧短捐鈔王正誼等任聽將空鈔抵補蒙混奏銷實屬營私舞弊

王正誼台斐音家產著先行查鈔入官其所虧官項俟結案時一併查明分別覈辦○諭瑞昌王有齡奏嘉興失守請將攜銀先逃之知府革職拏問等語賊匪竄踞吳江復撲平望營盤署提督江長貴受傷折回省城二十六日逆匪三路並進攻破嘉興南門以致郡城失陷署嘉興府知府甯波府知府張玉藻於賊匪未至之先既不能豫爲準備輒藉經管局務爲名攜銀逃走航海避至紹興實出情理之外僅予革職拏問不足蔽辜張玉藻著卽行正法以爲棄城逃避者戒○諭瑞昌王有齡奏流洞橋擊賊獲勝並請將聞賊先逃之營弁革職等語本月初一日宜興溧陽之賊由張渚犯流洞橋已革參將王鼎甲等不戰而潰經米興朝派兵馳勦轉敗爲勝所有駐守流洞橋之黃巖營守備汪超英臨陣退縮棄營逃回省城僅予革職不足蔽辜汪超英著卽行正法王鼎甲等

經革職胡岳虎著卽革職與王鼎甲一併暫畱軍營如再不知愧
奮卽著按軍律懲辦○諭軍機大臣等昨諭都興阿取道臨鳳馳
抵江北帶兵進剿以免紆折遲誤茲據奏籌商調撥馬步各隊催
辦餉項情形一摺據稱擬調余際昌所部三千餘名胡林翼因此
軍移動霍山藩籬盡撤深以北路空虛爲慮且該營欠餉未能支
領尙須催辦至抽調吉林馬隊未見多隆阿咨覆而舒保所撥西
丹又復疲弱不堪見到英山馬隊止有百餘名實難得力等語見
在江北久無統帥防剿喫緊若該將軍因馬步兵單繞道馳赴則
遷延日久深恐有誤事機著官文胡林翼迅卽飭令多隆阿舒保
將所部馬隊酌量調撥都興阿軍營與該將軍見有馬隊合計湊
足四五百名以資攻剿並著調得力兵勇三四千名派委鎮將大
員一二人管帶聽該將軍調遣江北李若珠所部一軍該將軍馳

抵後即可全歸統帶都興阿仍遵前旨酌量情形取道臨鳳剋期馳往江北督辦堵剿事宜勿得再有遲誤所需餉項卽著官文等寬爲籌備源源接濟並將該將軍見在調到馬步兵勇由楚省先爲籌備餉需以便迅速啟程至都興阿啟程遲延爲籌商調撥官兵催辦餉項起見事出有因所請交部從重治罪之處著加恩寬免將此由六百里各諭令知之○諭瑞昌王有齡奏嘉興失守統兵相機進剿一摺江長貴一軍駐紮平望原以保衛嘉興乃一經該逆攻撲兵勇輒紛紛潰散以致嘉興失守賊氛日熾逼近省垣覽奏實深憤懣前有旨令瑞昌總統江南軍務並令江長貴幫辦軍務嗣因賊至武康杭城危急復諭瑞昌先顧杭城再圖進取見在江長貴受傷折回省城仍著瑞昌親統各軍出省剿辦王有齡畱於省城布置一切無須帶兵出省江長貴業經受傷退回如不

能勝幫辦之任卽著瑞昌王有齡遴選提鎮大員奏請幫辦此時瑞昌帶兵前赴嘉興一帶卽令張玉良爲前敵至逆匪欲擾甯紹完善之區該將軍等卽派賴信揚督帶水師礮船扼要巡防並激勵民團聯絡守禦毋令紛竄署嘉興府知府張玉藻黃巖營守備汪超英見賊先逃僅請革職不足蔽辜已明降諭旨將該員等卽行正法以儆其餘浙省軍務疲玩已極該將軍等務當力加整頓以挽積習而振軍心將此由六百里諭令知之○戊午諭內閣本日據李若珠奏辭逆糾黨入湖官軍圍攻全數殲滅一摺前因辭成良歸誠效順獻出江浦縣城屢次出力著有戰功迭經降旨褒獎賞給三品頂帶並賞戴花翎其部下頭目人等亦經分別加恩獎勵以爲自拔來歸者勸昨據喬松年奏辭成良自退至揚州後因索餉不遂輒稱帶領所部回籍歸農經糧臺發給餉需聽其遣

散乃薛成夏旋即擁眾入邵伯湖中搶掠露筋祠等處李若珠請
撥兵追捕朕恐薛成夏與軍營各員或有齟齬不合而去是以諭
令李若珠剴切曉諭不得遽加勦戮以致稍有屈抑乃本日據李
若珠奏前令副將王萬清前往曉諭竟被薛逆拘留復膽敢於高
郵之王家港築壘六七座勾結西蒺塘賊匪約期東竄叛逆顯然
無從寬免當派副將劉成元總兵黃開榜等各率水陸官兵進攻
而薛逆猶敢憑壘抗拒經官兵四面焚燒逆眾始奪船逃竄我軍
截住轟擊立將薛逆大小船隻三百餘號全行焚燒逆眾剿除殆
盡薛逆見官軍逼近投水身死薛成夏投誠已逾一載迭受恩施
宜如何感激圖報乃始則索餉劫官繼而勾結巨逆負嵎築壘狼
子野心怙惡不悛實屬自外生成罪無可追除不願從中內應之
五品花翎王品裕周大有唐春光孔慶祥等深明大義及隨同投

出之被脅男婦一千餘名均著准予免死外其生擒之男婦百名
卽著李若珠分別訊明正法遣散安爲辦理所有此次在事出力
將弁文武准其擇尤保奏候朕施恩至辭成夏降而復叛法所不
容自應大加懲創以伸國法而快人心其餘各路軍營如有去逆
效順真心投誠者一經統兵大臣及各督撫奏聞仍必優加褒獎
不吝恩施將此通諭中外知之○諭軍機大臣等前因何桂清奏
已飭查文經與曾秉忠管帶師船往高寶邵伯湖一帶防剿當以
查文經係專辦糧臺之員陳欠新餉豈能歸於無著非何桂清心
已昏憤卽係該員自爲脫身之計諭令辭煥迅速追回飭該員清
理江南糧臺事務並著該署督設法籌款並籌兵米派委妥員帶
赴江北糧臺或於泰州分設糧臺專放鎮江一軍及大江水師餉
需本日喬松年奏查文經見已渡江此時鎮城暨水營兵勇見糧

臺大員到此仍置兵餉於不問恐致渙散決裂請飭查文經無庸
管帶戰船仍辦江南糧臺以專責成等語著該署督仍遵前旨將
該員追回另揀妥員於江甘一帶擇地安設江南糧臺妥爲辦理
迅由上海籌畫餉源接濟若令諸軍飢潰惟辭煥是問查文
經從前經手收支各款並著辭煥飭令該員逐款交代清楚如有
含混浮冒卽著嚴行參辦喬松年片奏長龍船兵餉請彙入水師
艇船項下由南臺一併籌給等語此項兵餉卽著由江南糧臺支
放至江北糧臺事務已降旨令王夢齡督同喬松年辦理本日復
諭令山東河南各將部撥銀十萬兩迅速解往既有督辦大員該
運使不得以呼應不靈爲詞仍當不分畛域寬爲籌濟再大理寺
少卿潘祖蔭編修楊泗孫奏稱常熟縣知縣周沐潤督率沙勇克
復城池但僻處海隅遇有緊急要務非稟知上海卽郵達江北展

轉遷延機宜易失請飭丁憂在籍內閣學士龐鍾璐督同周沐潤
攻剿附近未復州縣龐鍾璐曾任大員遇事准其專摺具奏等語
所奏不爲無見著辭煥卽行傳旨諭知龐鍾璐並飭周沐潤如有
緊要軍務卽稟明龐鍾璐就近馳奏其江陰等縣民團前隨周沐
潤出力者並著該署督飭令查明請獎藉以鼓舞人心此時江南
逃兵充斥著辭煥通飭各屬州縣出示曉諭如有逃散兵勇過境
擾害居民卽著格殺勿論俾此輩奸徒稍知斂迹以靖地方將此
由六百里諭知辭煥並傳諭兩淮鹽運使喬松年知之○諭前因
江北餉需益絀當准部議令文煜慶廉於山東河南二省各撥銀
十萬兩以資接濟茲據喬松年奏江南賊氛徧地淮南片引不行
淮北課銀悉充皖餉刻下運庫已空所有應發各項餉銀無從籌
給情形甚爲可慮著文煜慶廉務將未解餉銀迅速接續撥解江

北糧臺以濟要需毋稍延誤將此由六百里各諭令知之○幫辦軍務四品京堂許乃釗奏金陵大營潰敗情形請將翼長王浚卹典撤銷得旨此等語朕聞之已久然當時汝在軍中旣確見王浚播弄威權何不單銜密奏於大局不無小裨逮軍潰地失人已死而追論於後不知者或被汝愚朕豈能受汝之愚此無他身家之念重耳至王浚惡劣聲名疊飭和春密查伊總以爲可用是以未撤今若仍照提督例卹典原未免過優著飭部改爲照參將例議卹以昭平允此朕心自有權宜初不因許乃釗此奏也王浚以一武弁從征十載隨向榮由楚至江雖有劣蹟尙能見危授命視僕僕奔走爲何如耶視自命書生偷生海隅又爲何如耶此摺並硃批著與本日值日奏事之各堂官公同閱看由閣發鈔俾共知悉○以捐輸軍餉永廣江蘇蘇州府學額十名江陰三名婁縣二名

華亭一名江西樂安學額九名四川安岳眉各二名簡德揚巴達
大竹仁壽南充廣安岳池三臺遂甯蓬溪富順邛各一名○己未
諭軍機大臣等僧格林沁恆福奏疊調官兵到防並俄船停泊北
塘投遞米夷信函各等語直隸備調官兵四千名除分撥唐兒沽
及環壕礮臺等處防守外所餘及新調之兵共止有二千名爲數
較單青縣一帶爲山東等省入京要道亟宜駐紮重兵以防奸宄
溷迹所有前項備調官兵二千名著僧格林沁等遵照前旨揀派
得力大員迅飭前往該縣駐紮當由京營另調兵二千名派克興
阿管帶前往一併駐紮青縣與直隸官兵分作兩營以厚兵力而
資捍禦俄夷寄京信函著恆福派員接收轉送京師至米夷轉遞
信函和約內並未載有米國由天津海口呈遞之條是以礙難接
收如米國欽差船隻到來可告以兩國旣已換約自應按照條約

辦理別無再議如欲給英佛兩國從中調處亦須由上海辦理五口通商欽差大臣處商議方爲信守和約之道將此諭令知之○諭本日據戶部奏變通奉天山東捐米並雜糧章程以濟京倉一摺據稱本年新收及存倉舊漕米石數目約計甲米可放至十二年七月俸米可放至十二年秋季若來歲南漕不能接濟兩年以後恐有缺乏之虞擬令奉天山東於向辦捐米章程量爲推廣並准將早稻白米及各項雜糧分別定價一體交捐運赴京倉以資接濟等語京倉爲根本重地該將軍等自宜竭力圖維寬爲籌備著王明倭仁景霖文煜迅速辦理不得視爲具文貽誤放款亦不得稍形冒濫致礙各項捐輸其應如何推廣變通之處著各按地方情形妥爲籌畫先行具奏毋稍遲延至該部摺內所稱山東省歷年捐米除運京放賑外尙餘若干請飭該省查明限一箇月報

部速運赴通又黃河爲患已隔多年濱水居民想應得所捐賑名目應行裁除並以後捐米應按舊章將運腳折耗均在捐生報捐內覈算清楚不得再行開銷以節浮費等語著文煜卽按照該部所奏各條覈實辦理毋許稍涉含混致滋浮冒其奉天所捐米石運腳折耗卽著照山東一律辦理將此各諭令知之○曾國藩奏臣連日與官文胡林翼籌商臣所部萬人暫交臣弟曾國荃畱皖統帶但於安慶圍師中抽出總兵朱品隆副將唐義訓之二千人從征而飭臣弟另募二千以補其闕又於鄂師中咨調綏靖鎮總兵鮑超霆字營六千遊擊楊鎮魁禮字營一千合之見駐宿松馬步隊約共萬人隨臣先行過江又遵調開歸陳許道張運蘭一軍並咨商湖南撫臣駱秉章候補四品京堂左宗棠在湖南募勇萬餘人挑選將佐配齊軍械陸續由江西以達皖南會合進剿惟鮑

超因傷疾舉發給假回蜀計須下月始到張運蘭遠在郴州計須七月乃可趕到左宗棠續募之勇到皖更須時日臣目下南渡兵數甚單統將未齊應先駐紮祁門縣境東以聯張芾徽州之聲援西以保江右饒州之門戶俟鮑超張運蘭到時卽令分赴徽甯蕪湖兩路俟李元度五千人到時卽由廣信赴浙蘇一路計三人到營之期先後不甚相遠臣自宿松啟程便道至安慶水師營次與楊載福彭玉麟面商後卽由建德以趨祁門儻下游軍情愈迫鮑超等到營稍速臣當隨時策應不敢稍涉拘泥又奏淮揚二郡自古稱爲澤國北有長淮南有大江中有洪澤邵伯高郵寶應諸湖運鹽串場人字芒稻諸河巨浸支流互相灌注一片汪洋若能造戰船二三百號多購洋礮精選將弁則不特可以保下河之米場竈之鹽亦且可以輔揚州之陸軍使逆賊不敢北犯助臨淮之陸

軍使川路不至梗塞此淮揚水師急宜籌辦之情形也賊守金陵以安慶廬州爲犄角以太平蕪湖爲護衛蕪湖之南有固城南漪丹陽石臼諸湖上則通於甯國之水陽江清弋江下則止於東壩掘東壩而放之則可經太湖歷蘇州以達於婁江古之所謂中江者也蕪湖孤懸水中賊匪守之則易官軍攻之則難是以五年血戰不能得手而黃池灣汴屢次失利皆以全無水師之咎臣愚以爲欲克金陵必須先取蕪湖欲取蕪湖必於甯國另立一支水師徧布固城南漪等湖之中甯國水師攻其內大江水師攻其外如七年攻破湖口之例庶幾蕪湖可克而東西梁山可期以次恢復此甯國水師急宜籌辦之情形也逆匪堅忍善守官兵圍攻屢年往往因水路無兵不能斷其接濟從前武昌九江臨江吉安等城之拔實亦舟師之功居其少半側聞紅單師船體質笨重非大江

狂風不能起碇又不能接應陸戰不能巡哨汊河金陵所以久而無功亦由水師一面終始不得絲毫之助今蘇州既失面面皆水賊若阻河爲守陸軍幾無進兵之路城外幾無紮營之所臣愚以爲欲攻蘇州須於太湖另立一支水師浙江無事宜於杭州造船浙江有警亦宜於安吉孝豐等處造船必使太湖盡爲我有而後西可通甯國之氣東可拊蘇州之背而陸師亦得所依附此太湖水師急宜籌辦之情形也此三者皆目前之急務如力不能兼則先辦淮揚及甯國二支如力仍不逮則專辦淮揚一支蓋蘇省財賦之區淪陷殆徧僅畱下河之米場竈之鹽若不設法保全則東南之利將盡棄矣臣自咸豐三年奉旨辦理水師閱歷頗久而三處皆臣管轄之地鹽漕皆臣應辦之事頃已專丁至袁甲三軍營面詢淮安等處尙有木料可以造船者否其甯國安吉亦當派人

前往察看木料之多寡船工之難易至礮位一宗擬卽日派員齎銀至廣東購買洋礮五百尊由大庾嶺過山以達江西而出湖口又由英霍等縣過山以達固始而出長淮計往返須五月有奇程途雖遠而期限必嚴搬運雖艱而志在必行是否有當伏乞 聖慈詳明指示又奏 臣 擬辦淮揚水師保裏下河產米產鹽之利然以 臣 屈指計之收效恐在一二年後不知部 臣 另有變通之方籌備京米否但此事要在必行仰懇 聖恩寬 臣 期限俾得辦成水師卽防剿亦有裨益仍請飭下戶部查明京倉米石存餘若干是否足支壬癸等年之用咨行到 臣 俾得斟酌籌辦又奏鄂省爲各路用兵之樞紐自古有事於大江南北者必爭此上游形勢湖北但有重兵卽足制賊死命然 臣 已調鄂兵七千都興阿帶赴揚州又分數千人兩路各撥餉數萬湖北之力甚形竭蹶設愈分愈薄

鄂省一有疏虞則南六省之奏報不能達於北路伏乞 乾斷嗣後他處喫緊毋再抽撥鄂省兵勇俾官文胡林翼等得以勉力支撐不至蹈金陵大營覆轍 上諭曾國藩奏抽撥兵勇啟程渡江擬設三路水師並籌畫京倉米石湖北官兵不宜再調各摺片蘇州失陷以後崑山吳江相繼不守賊蹤蔓及浙省遂陷嘉興新授巡撫薛煥雖由上海督勇克復太倉嘉定而地僻兵單勢難展布杭州將軍瑞昌前曾命其統師赴蘇見因杭城危急亦恐未能前進曾國藩見已抽調兵勇萬人由宿松進駐祁門俟鮑超張運蘭李元度到後卽由徽甯蕪湖廣信分路進兵具見胸有成竹謀定後戰惟蘇省待援迫切該署督惟當催令鮑超等迅速來營會籌進剿但能援師早到一日卽早一日救民水火實深殷盼該署督進駐徽境後擬卽整頓皖南吏治該處軍務亦應統籌昨有人奏

張芾等任賊長驅以致江浙大局決裂見徽甯兵勇尙有三萬餘名若統歸曾國藩節制即可簡其精銳以資攻剿不必專俟新募之勇等語張芾督辦皖南軍務於賊匪入浙不能堵禦咎無可辭徽甯等府本曾國藩兼轄地方該處軍務如併由該署督辦自屬事權歸一惟地方遼闊能否控馭得宜著曾國藩於抵徽後察度情形奏明辦理該署督見統兵勇較單未可輕率前進宜加持重爲要至所稱擬設淮揚水師以保裏下河之米各場竈之鹽兼輔以淮揚陸軍均屬目前要務應卽興辦至設甯國水師以與大江
水師夾攻金陵設太湖水師以規復蘇常所籌亦屬周妥惟曠日持久勢難坐待止可一面照議辦理一面相機進剿以速解倒懸之眾至京倉米石久形短絀蘇常雖經淪陷而產米之區尙復不少其本年漕米應如何酌量催徵起運赴京卽著該署督咨商

辭煥熟籌辦理事關京師根本該署督責無旁貸諒能悉心策畫
至鄂省官軍擬難抽調自屬實在情形曾國藩所募之勇人數較
多所有餉需自應早爲籌及總須得力可用方能餉不虛糜將此
由六百里諭令知之○官文曾國藩毓科奏查九江爲江楚咽喉
關繫兩省全局從前普承堯進剿建德兼扼彭湖已屬跋前疐後
若再進紮馬田洋湖阪一帶是專注徽防距潯愈遠轉置兩省門
戶於不顧見在賊勢趨重蘇常而皖南連復旌涇太后數城軍聲
較振普承堯一軍未便深入皖境仰懇 聖恩俯念九江險要攸
關准令普承堯統率全部扼守巡防以固江楚門戶兼可與道員
彭玉麟水師互相策應爲 臣曾國藩進攻皖北後路聲援至駐軍
之下隅阪查非扼要之區應令相度地勢另行擇要紮營專顧潯
防兼控建德以杜窺伺仍俟池州收復徽師堪以抽調由張芾派

軍駐防或江省往援蘇浙之師凱旋有兵可分再行酌覈辦理

上諭軍機大臣等皖南自克復涇旌石太後建德防守稍鬆普承堯所部兵勇未便令其深入皖境著張芾卽飭普承堯統率全部擇要扼守以固江楚門戶與彭玉麟水師互相策應兼爲曾國藩所統一軍後路聲援至該總兵見駐軍下隅阪地方僻處一隅勢難兼顧並著飭令相度地勢另行移紮專顧潯防並控建德以遏賊氛而固疆圉○諭前據張芾奏稱普承堯一軍僻守一隅無濟於事當諭毓科飭令該總兵統率所部移紮馬田或洋湖陂等處以資堵剿茲據該撫等奏稱皖南自克復涇旌石太後建德防守稍鬆普承堯所部兵勇未便令其深入皖境著毓科卽飭普承堯統率全部擇要扼守以固江楚門戶與彭玉麟水師互相策應兼爲曾國藩所統一軍後路聲援至該總兵見駐軍下隅阪地方僻

處一隅勢難兼顧並著飭令相度地勢另行移紮專顧潯防並控建德以遏賊氛而固疆圉並著毓科知會張芾遵照將此由六百里諭令知之○庚申諭軍機大臣等前據勝保翁同書先後奏稱捻首孫葵心乞降當經諭知勝保必須殺賊自贖真心來歸再當酌辦不可輕率從事茲據勝保奏該捻首極知感畏情願自拔迷津率眾薙髮擬先派員前往料理再行擇日定地受降並將翁同書致勝保信函及孫葵心投誠稟詞一併呈覽孫葵心係著名捻首人數眾多若能撫之歸來羣捻亦易於懾制其機自不可失惟此輩狼子野心難保不因人多乏食窮蹙來歸以投誠爲領餉之計設或受降以後其部下人眾因所欲不遂仍復四出擄掠擾害地方是以有用之經費參養盜賊其弊何可勝言勝保前已有旨令其來京以三品京堂候補著翁同書察看此事有無把握如果

真心投誠卽著該撫接辦其應如何駕馭及受降以後部下人眾如何分別遣散妥爲安插之處均著該撫通籌大局悉心經理毋得稍涉大意致貽後患將此由六百里諭令知之○諭勝保慶廉奏進剿亳州捻匪攻克賊圩一摺李河潤及黃莊賊圩爲捻匪入豫要路見經官軍攻毀殆盡自應乘此聲威速行進攻將亳州境內各賊圩一律剿除著慶廉卽行督飭帶兵各員與關保協力防剿一應團練剿撫事宜並著妥爲布置該撫身任地方責無旁貸務須盡心籌畫毋得遷延貽誤致負委任將此由六百里諭令知之○辛酉諭內閣前因戶部字號月支經費議請加增未經奏明該司員等混入奏銷案內彙總開銷諭令管理字號奏銷及標費存彙之戶部及各堂官明白回奏茲據翁心存全慶沈兆霖基溥寶鋆先後回奏據稱該司員辦理五字奏銷時逾限數月催令趕

緊清算因宇商添支經費曾經翁心存等駁覈議減並未奏明該司員已將此款列入奏銷清單並奏銷後始補畫存彙均未查出自請嚴加議處各等語宇號月支經費係奏明定數即使不敷酌議加增亦應奏明辦理乃該堂官等於酌添經費未能專摺陳奏遽任該司員等列入奏銷清單並當時未立存彙事後始行補畫種種錯誤咎有應得翁心存沈兆霖基溥寶鋆著分別交吏部都察院嚴加議處全慶於辦理五字奏銷時尚未到任惟隨同補畫存彙亦有不合著交都察院議處○諭有人奏四川提督占泰當賊在自貢兩井時駐兵下游並不出戰屢次虛報勝仗二月初八日在馬踏井大營慶賀生辰令將弁拜壽收受禮物賊竄五通橋牛華溪等處該提督仍駐兵榮縣半月之久遷延不進致賊連陷眉州青神彭山蒲江邛州等處三月十九日賊竄名山仍不追剿

以致名山又陷且以克復冒功並有毆打知縣劉棟威需索供給
民人徐恆順等在建昌道鄂惠處稟告有案等語又有人奏占泰
怯懦無能擁兵自衛且忌功妒能不許人打仗并研縣知縣劉棟
威因稟其逃避該提督喝令隨從捶擊幾殆所過州縣惡其擾害
閉門不納甚至開礮轟逐總兵虎嵩林亦有賊至按兵不動之說
四川臬司蔣徵蒲由捐納道員坐升臬司督辦軍務怯懦無能又
四川近來辦事大權全歸於成綿龍茂道濮貽孫其人由佐雜捐
升道員無孔不鑽無惡不作通省以其貪而忘禍或呼爲撲鐙蛾
曾望顏初到四川聲望頗重傳聞該道有餽送該督黃金三百兩
之事後遂遇事挾制肆無忌憚該道又藉軍餉爲名按畝斂錢每
日二文十日一收差役四出騷擾大半皆飽該道私橐候補令武
姓欲揭其劣蹟該道餌以卽補好缺久而食言武知縣厲聲相向

該道慚沮無辭等語事關吏治隳壞軍務廢弛虛實均應徹底根究著崇寶會同東純確切查明據實參奏毋得稍有不實不盡自干咎戾將此由五百里諭令知之○文煜奏洋人陸續到煙臺者約共一萬數千人驟車馬匹亦復不少探聞過暑後放船至海豐縣之大山地方再行水陸兼進直赴天津奏入諭僧格林沁等熟籌妥辦○江蘇學政孫葆元奏江陰等處情形得旨時事艱難汝雖任學政自應振刷精神不可豫存退志○壬戌諭內閣前諭江蘇等省辦理團練並令在京大小官員各就地方情形直抒所見並各舉所知候旨派往茲據大學士彭蘊章等酌擬辦理章程十條呈覽均屬可行自應一律辦理著派大理寺卿晏端書作爲江北督辦團練大臣馳驛前往並著淮徐道吳棠幫辦團練事宜在籍內閣學士龐鍾璐著作爲江南督辦團練大臣其幫辦之地方

官著彭蘊章等於江蘇司道中訪察保奏候旨簡派晏端書等卽按照所議條款體察情形妥爲辦理○諭前諭陝西等省在京大小官員各就地方情形各抒所見籌辦團練事宜並各舉所知候旨派往茲據戶部左侍郎梁瀚奏酌擬辦理章程九條呈覽均屬可行陝西團練卽派署巡撫譚廷襄督辦前任陝西陝安道坐補鞏秦階道陳晉恩著發往陝西與見任陝安道張守岱在籍候選知府馬百齡均幫辦團練事宜按照所擬條款並參酌河南等省章程體察情形妥爲辦理○官文胡林翼奏曾國藩奉命署理兩江總督部下兵力實薄若遽撤安慶之圍則皖北全局震動再四商榷於安慶圍師中抽撥朱品隆等馬步一萬餘人渡江啟程安慶圍師尙須添募以益兵力雖經臣胡林翼趕緊召募而新勇未至舊隊先行彌縫補救實已竭蹶不遑都興阿到英山亦言安慶

桐城潛山霍山等處兵力實形單薄見據副都統多隆阿舒保前
後咨稱馬隊不敷防剿臣胡林翼先行咨送遊擊周玉成等親兵
二哨統計馬步不滿千人都興阿五年入楚北七年入皖北血戰
經營始得此尺寸之土地若使楚師盡行皖疆復委棄於賊實非
都興阿之心且皖北地方八年之久未覩官軍威儀該省新復之
宿松太湖潛山等處六州縣殘黎喘息未定每聞撤調兵勇則士
民遮道號泣慘不忍聞若以兵少餉竭棄此予遺之皖民而僅以
保境圍爲心亦非臣等所忍出此都興阿足疾本未全愈乘輿以
行需人扶掖前在省城臣等卽屬其暫行養息數旬都興阿力言
不可臣等目擊其精力短絀衝鋒陷陣實恐不能再馬隊必須步
隊相輔今則副將石清吉雷正綰總兵鮑超等旣不能同行余際
昌三千三百人獨當英霍一路一搖足而山險盡失若以零星隊

伍雜湊成行則北人管帶南勇風氣既異情僞又難盡知近日楊載福彭玉麟督率水陸將安慶東路樅陽鎮僞城克復樅陽爲安慶之咽喉賊匪糧道必經之處且皖北逆首陳玉城及各賊目之妻孥畜產盡在安慶城中賊之來援必速查湖北兵力未分時陳逆糾十萬之賊西犯以救潛山太湖臣等與曾國藩合力圖謀血戰月餘屢瀕於危幸而勝之今則賊既無所顧忌必挾全力西犯以謀楚軍曾國藩既已渡江楚省兩次又分去勇丁一萬六千人臣胡林翼新募各軍尙未趕到是楚北皖北之危迫情形不待智士而已知之都興阿有督辦軍務重寄非臣等所敢擅畱惟細審兵勢賊勢及都興阿近日精力頹懇 聖恩另簡大員馳往江北其安慶桐城後路空虛應以臣胡林翼兼行替管黃州德安漢陽一帶可否暫飭都興阿移入麻城孝感黃陂等縣養息病軀藉其

聲威坐鎮或可補救萬一再聞布政使薛煥見在揚州應否專委
召募陸勇水師以保揚州鹽場及裏下河產米各州縣吳楚皆擇
國也以舟楫爲利水師一萬可抵步兵十萬應請飭下督臣曾國
藩於淮安設大府選將募勇造船鑄礮另設水師專營奏舉賢才
破格錄用假以便宜淮安地處上游江湖河海均可通行異日克
復江南蘇州常州各郡縣必以水師爲根本其甯國太平等府之
石關湖南碭湖應另設水師一支衢州杭州亦應設水師一支勤
遠謀而收實效果水師得力則吳越可平曾國藩自咸豐三年勦
造水師管帶最久賢才既多功績既大以此委任而責其成功事
必有濟 上諭軍機大臣等據官文等奏湖北撥派兵勇已多趕
往湖南增募勇丁並請另設水師專營等語與曾國藩所籌適相
符合曾國藩見已抽調兵勇萬人由宿松進駐祁門俟鮑超張運

蘭李元度到後卽由徽甯蕪湖廣信分路進兵並擬設淮揚水師以保裏下河及各場竈並輔淮揚陸軍已令卽日興辦鄂省官軍調出已多漢黃德三府空虛無備恐賊匪乘間內犯繞入腹地包襲安慶桐城英霍後路不可不防胡林翼已派員前往湖南增募勇丁著俟新募各軍到後妥爲布置勿使逆匪得伺其隙新授江蘇巡撫薛煥見在上海並未前赴淮揚江北統兵大員非李若珠所能勝任都興阿雖患骹疾不能騎馬然該將軍久歷戎行曉暢兵機正可藉資調度不必衝鋒陷陣親臨前敵著該大臣等仍遵前旨調撥馬隊兵勇並籌備餉項派赴都興阿軍營以便該將軍統帶啟程前往江北督辦堵剿事宜勿稍遲誤將此由六百里諭令知之○諭瑞昌等奏廣德失陷賊蹤剽疾並欲添調黨援三四萬以圖大逞恐其席卷而東則浙省面面受敵將有應接不暇之

勢著卽咨催江長貴一軍進紮餘杭爲張玉良等後路策應毋令再有疏失嘉興賊匪出擾屢被民團擊退張玉良收集江南潰散兵勇合諸省城內外防勦諸軍及福建江西新撥各隊不下六萬餘人兵力不可謂不厚見已前赴石門灣白洋鎮之間步步進紮並調水師礮船駛赴石門以便水陸並進張玉良素稱勇敢前次救援杭州厥功甚偉故命署理欽差大臣總統諸軍旋以蘇州失守潰退革職畱營著卽飭令迅速前進立復各城以贖前愆儻所向有功仍可重膺懋賞毋再挫失致干咎戾張芾奏餉源告竭道員孫觀赴浙乞餉未回暫行代辦之道員福咸又藉病諉卸請派大員經營糧臺等語著王有齡迅派大員前赴甯國辦理糧臺以專責成將此由六百里諭令知之○諭張芾奏廣德涇縣先後失守徽防戒嚴分兵堵截一摺賊匪敗竄回撲涇縣又復失陷徽甯

之路隔絕亟宜乘其喘息未定迅圖克復卽飭道員蘇式敬等由績溪旌德迅速進攻節節掃蕩克復城池以保浙皖門戶據奏廣德之賊盡數竄出是否該州城已經收復並著查明具奏至皖餉缺乏前據張芾奏請飭江西等省撥解已令戶部速議具奏旋據該部奏准於湖南湖北各撥銀十五萬兩並令江西仍於每月解足三萬兩之外再行籌撥數萬兩迅解皖南以資接濟著張芾先爲安撫軍心毋令譁潰俟各處餉項解到與周天受一軍酌量分用以安眾志將此由六百里各諭令知之○薛煥奏臣奉命署理欽差大臣後卽照會英佛米俄四酋英佛並不照覆額爾金葛羅到滬惟裝運軍火行李上船並帶有竹梯車馬木刻假洋人等數日內卽行北駛經華商楊坊等勸其與臣見面該酋答以止知進京不與外省官員相見額爾金卽日起碇葛羅尙須稍遲數日米

俄兩酋亦附和同行決意北駛無從勸阻奏入諭恆福派員因勢利導僧格林沁妥爲辦理○以廣德涇縣等城被賊竄陷張芾下部議處○予安徽陣亡總兵官李嘉萬等祭葬世職